

whakaparahako a na tanata o te pariha ki te Minita. Kahore nei e maharatia na kupu a Paora, "Kua ruia nei e matou na mea wairua ma koutou he mea nui ianei ki te kotia e matou a koutou mea o te kikokiko?" Me tenei, "Te tanata e whakaakona ana ki te kupu, me whakawhihi e ia tona kai-whakaako ki na mea pai katoa." Kahore rawa te Minita e ora i ta te iwi e whakarite nei hei oranga mona; kahore hoki he whare tika hei nohoanga mona. Me i kore te mahi a te taha Pakeha o te Hahi kua mate rawa atu na Minita o te taha Maori. Ehara i te mea he rawakore no te iwi Maori, enari he ahua whakaparahako ki te mahi a Te Karaiti. Ko na kohikohi a te taha Pakeha, horomia ana e te taha Maori; te tukua atu hei hari i te Rojo-pai ki etahi wahi.

Tera atu ano etahi kupu a te runanga Pihopa, e kore e taea te ata korero inaianei.

Tetahi mate o tatou inaianei ko etahi o na pariha e hapa tonu ana i te Minita. Ko etahi o na Minita o na tau kua pahure atu ra kua kaumatuatia, kua kore e whai kaha. Ko Tamihana Huata, kua tutuki ki te okiokianga i te mea kua 47 na tau o tona minitanga. No mua tata ake nei hoki, ara no te 29 o Hanuere, ka moe a Aperahama Tamihere: ki ta te tanata ki, kihai i ata tutuki ona ra. He mea enei e hono ai ta tatou inoi ki te Ariki nana te kotinga, kia tonoa e ia he kai-mahi ki tana kotinga.

Tera ano tetahi mea e puta nui ai a tatou inoi ki te Atua, ko te mahi i timataia nei e Mihi Toera raua ko Rotu ki Ruatoki. Ko taua wahine i paia e te mate, a hoki ana ki Australia. Te ki a na takuta, e roa tona mate e kore ai e hoki wawe mai ki tana mahi. Me whakawhetai ano ia tatou ki te Atua mo te kuwaha kua tuwhera nei ki tera wahi e tapoko ai te marama o te Rojo-pai ki reira, mo tana whakakaha hoki i a Rotu raua ko tona hoa, ko Ewa Wi Repa ki te hapai i te kara a Te